

## Mo Pol Filipai la nai Sios Elim Ginofe Faini Hwa buk enaig esog

Filipai eba kwania kembang Masedonia Provins la gi. Pol Godna suialag mo ena nai yi sihina. Afa ena kembang mo fwahanam sa ming kembang la ikana, asa ehem kalabus yi fatini. Asa kalabus yi gafnaba afa higinaba mingnag el ona Filipai elni olug onigigim gasafihiagi. Afa hwa buk la bigel mas ambala anwenafig mo mangwal kinig Polim sa puguna. Afa Pol olug onigig Sisas Kraisna yi gofna asa sifakalegna gafna. Afa autunam maia Pol gawig fwainig fenaba asa Filipai la nai el ehem kwefuni. Asa hwa bukba Pol Filipai la nai elim suialagoni maia ehem kwefunibi. Afa ming onigig gafa Pol membeg Filipai elni olug onigig sa ma wasneig afofi. Masa ehengel enaig onigig flife Polba kalabus yi ga asa enam olug kinig gonifife. Pol ehengelim sihini mangwal sa ne Godna flig eba naho glau nai nofkenagag Ainiyag Sisas nai flig. Eba enaig sihifeni, ehengel mas Ju elni nihem patalufunam asa enaba flig. Amo eba ehengel Sisasim olug oniginigim asa enag flig. Afa Pol membeg Filipai el sa ma Kraisna nihem gwenai esig. Afa Krais mas enaig onigigfena mo, og kaba kwania el feg afa ehe mas hiafna membugum patalkuna mo amo, eba awai. Afa ehe hefim pigaupinamba asa God gafugag ehem fainaba asa ehe enam gafugafena.

### *Pol Filipai la nai elim suialag oni*

<sup>1</sup> Ka Pol i Timoti i kaningi Sisas Kraisna gafugag el ka ahfeg. Ka nem hwa mo ahfaig. Nengel sa ne Filipai la nai Godna el sa ne afohie. Afa siosna saglag el i afa siosna

kwaganig el i sa ne mungwali Sisas Kraism olug onigini enag ka nem hwa ginofba ahfaig.

<sup>2</sup> Ka membeg God bigelni Api i afa Sisas Kraism bigelni Ainiyag i sa ma nem enaig sahfeni. Asa ma olug enesieg nem feni afa God esmunagim nem kwagani.

*Pol Filipai la nai elim oniginim Godim sahna*

<sup>3</sup> Afa maia ka nem oniginig gohba asa ka Godim suialag onagim afa ka enaig esog.

<sup>4</sup> Afa maia ka nengelim betenenigbi asa kana olug sifakaleg.

<sup>5</sup> Afa ilawana sa ne suialag mo higini enag ikag ikag glauwanga gwese gohba eba kana gafugagim kweafug afa sa ka enam onigigim ka sifakaleg.

<sup>6</sup> Afa ati ka enam anwenafeg asa God nem ese fwahanibi sa ehena suialag gafugagim pugu gwese gofiba asa Sisas Kraism pese blofe.

<sup>7</sup> Afa enag kana suialag onigig eba ihlafeg asa ka nem fwina membenig. Afa autunam ka isug gofenaba Godna suialag mo sihiakafena afa ka elim kwangan fena kog sama wasneig olug onigig kehli afa ne kam enag gafugagim kwefug. Afa glauwanga ka kalabus yi gohba ne gwenaig esig.

<sup>8</sup> Afa enaba God ati anwenafeg ka nem fwinafwefenig afa gwenaig Sisas Kraism gafa nem esenig.

<sup>9</sup> Afa ka Godim sahnaiba sama ehe nem enaig eseni asa ma nengelni membug pugu kwania feni. Afa nufunam onigig i afa suialagim kwefihiageg i gafa sama mungwali membug la wahegofi.

<sup>10</sup> Afa ne enaig esegbi eba sane numwehe anwenafife ha mina sa hag suialag nemug ika sa ne patalfu. Eba ne suialag el afohiefa asa ma Godna Gisfu Fwahag elni osuna pugui.

<sup>11</sup> Afa eba mungwali suialag nihe sama nem gohunfi enaba Sisas Kraisa la nai blog. Asa ma el enam nangunim sama Godna unehlag fingi fi.

*Pol membeg Sisasna gafugagim og sama gwese gofi*

<sup>12</sup> O nilite, hwaig kinig sa kam pugunagba sa ne anwenafi enaba mas Godna suialag mom kwehlakag mo amo, eba awai, enaba kaksag elim kwaganiba asa ena mo higfi.

<sup>13</sup> Afa enaigba puguba asa Romna misog elni lala nai anwasag el i afa mungwali mingnag el i enanai yi anwenafig kaba Kraisa gafugag el ka kalabus yi go.

<sup>14</sup> Afa mingnag kristen nilite kam nangugim afa ehengelni onigig wasneinim asa ehengel tahlag la Godna moba sihiafu. Afa ehengelni wasneig gwesim fwinam fena.

<sup>15</sup> Afa mingnag kam oksinigim afa oyna kam filafe fatinim asa ehe Godna mo sihiafu. Afa mingnagba suialag onigig figim afa sa Godna mo suialag mo sihig.

<sup>16</sup> Afa sonag el anwenafig God kam hwaig gafugag la fwahagba asa ka Godna mo ambala upugug eba nufunam feg. Afa ehengel kam membinigim asa Godna mo sihiafu.

<sup>17</sup> Afa mingnag nilite kam sa oksinig enag ehengel oyna heafgelni unehlagim fingi finim asa Godna mo sihi. Afa ehengel enaig onigig fini maia ka kalabus yi gofenaba sonaig moba kam kinig faig.

<sup>18</sup> Afa ka mas enam onigi eba ka sifakaleg. Afa ka anwenafeg mingnag elni onigig eba suialafeg afa mingnag elni onigig eba amtakwalig asa ehengel Godna mo sihiafuba eba ka enam sifakalegba ena sifakal gwese gofufe.

*Pol enaig onigifena kam lahai me awai ka nofkena gofi me*

<sup>19</sup> Asa ati ka anwenafeg ne kam Godim sahnibi afa sa Sisas Kraisa Sungwabug kam kweafufe asa ka ena kalabus lala fwaha pugufe

<sup>20</sup> Afa ka enam wasneig onigig feg masa ka wetiklug afwanefug flafe eba ka tahlag la eseagefe asa glau kalabus yi ka feg afa autunai la gafa enaig ka esegba eba ka Sisasna unehlagim fingi fukug. Afa kam lahai me awai ka nofkikena gofi me koka enaig ese.

<sup>21</sup> Afa ka mas lahagimba ka onigi. Afa ka nofkikena gohugba mungwali mangwal asa ka eseagegba Kraisi ehe enaigimba ehe mog feg. Afa ka lahagba eba ka suialag nofkenagag flafe.

<sup>22</sup> Afa ka nofkikena gofiba eba kana gafugag fug suialag pugu lugufe. Enaig esegba na sa ka sambaga onigi feg afa ka mas anwenafeg mo mangwal sa ka membeg eba ka flafe.

<sup>23</sup> Afa ka sambaga mina membeawagig. Afa koka hwa bite fwahanam ika Kraisi i hawagfim enaba suialag nemug feg.

<sup>24</sup> Afa maisiaba ka gofiba eba ka ma nem kwaganife.

<sup>25</sup> Afa ka fwina enaig onigi feg kana gafugag eba mas awaieg mo asa ka maisim nofkikena gofiba ka nengelni olug onigigim wasneihiageba asa ne enam sifakali.

<sup>26</sup> Afa maia ka nem pese blo nanguagiba sa ne kana gafugag nanguinim asa ne enam Sisas Kraisi unehlagim fingi fi.

*Nofeka angoluweg elim embefegon sa ne tahlag la afofum*

<sup>27</sup> Afa sa ne Kraisi suialag mo fwina patalfug sa ne gwenaig esi. Afa ka ne nangwagi me awai awai me eba ka mo higfe ne wasneigim afa ne mungu onigig fig. Afa ne mungu el lofugim afa ne mungu gafugagif sama kaksag el Godna mom olug onigini.

<sup>28</sup> Afa nofeka nimbeafgelni angoluweg elim embefegon afa sa ne tahlag la afofum. Afa ne enaig esigbi eba ne

angoluwag elim ogfugonig eba God nengelim kwaganiba asa ne ehengelim filafe klaitife.

<sup>29</sup> Afa eba God nem suiala fenife asa nem sambaga mina fenife eba enaig eseg eba sa ne Kraism olug onigini afa mingba eba ne heafna el fenim asa ne kinig flifie. Afa ena sambaga minaba eba Kraisma gafugag bigel sa big enaig esi.

<sup>30</sup> Afa autunam sa ka kinig i bagag ahfegofnaba ne nanguni afa glauwanga ne higig gwenais gwese go. Sa big mungwali enag gafugafinim asa big kinig gafa fli.

## 2

### *Sisas hefum ahnai skaufena sa big gwenais esi*

<sup>1</sup> Atiaho sa Kraism nengelni onigigba wasneinig? Afa atiaho sa heafna membuglaba esegba asa nengelni olug enesiegba fai feg? Afa atiaho sa Godna Sungwabug ni ne esinigbi asa ne mungu nilite fig? Afa atiaho sa ne mingnag elimba aflafegonug? Ei, eba nufunam feg.

<sup>2</sup> Afa eba enaig eseg asa ne mungu onigig na afa mungu membug na afa mungu mo na fibi eba ka fwina sifakalefe.

<sup>3</sup> Nofene nembefum fingi finim afa nembefum tutonbusiagi. Afa sa ne mingnagim ahnai skaufegon afa nofene enaig onig og kaba mingnagim gwesim gose gonug.

<sup>4</sup> Masa ne nembefum mungu onigife afa eba sa ne enaig onigifi afa mingnag elim sa ne suialafehiagi.

<sup>5</sup> Afa nengelni onigig sama Sisas Kraisma onigig lofe. Eba enaig eseg.

<sup>6</sup> Afa ehe God feg afa ehe mas enaig onigig fena mo og kaba gwenais wahkig gohug.

<sup>7</sup> Afa ehe heafna haig haigim fwahagim afa sa ehe isug gafugag el lofug fegim afa ehe el pugug.

<sup>8</sup> Afa hefum gwesim sugu pegim afa maia Alag ehem enaig esonagba asa gwenam patalkugim ikag gwenanai

yi lahag afa ehe enam higigim asa el ehem li katigeg la tigi kahlifi.

<sup>9</sup> Asa God ehena unehlagim fingi fukugim afa ehem sisi yi nemug hilifukugug fwahag afa sa mungwali gawig ehem ahnai skaufinife.

<sup>10</sup> Asa mungwali heven la nai i, bite nai i, afa bite menai i Sisasim mongkokini kwakwaganim asa ahnai skaufinife.

<sup>11</sup> Afa sa mungwali el ambala enaig esogofe, “Sisas Kraiss eba Ainiyag feg.” Afa enag mo gafa God Alagna unehlagim fingi fefe.

*Sa big ombusug lofug fi elim Godna mina ogfugonigim*

<sup>12</sup> Afa kana hihe autunam sa big auguiafenaba afa ne kana mo flini. Afa glauwaba ka kalabus yi gohba sa ne kana mo pese higim. Sa ne nembefum numwehifibi asa ne Godim ahnai skau nemug finim asa ne elni nihem patalfu el sa God pese suluiaflag.

<sup>13</sup> Asa ma God nem nengelni onigigim waikke waikke fehiagekafiba asa ne nogka wasneiniam afa sa ehena sawiegim patalfu.

<sup>14</sup> Afa gafugag sa ne feagigbi nofekawu lagwaganim afa sa nimbefum monagi.

<sup>15-16</sup> Asa ne enaig esi sa ne afsug el fi mas nem setigi. Afa neba ofenaiba Godna suialag luwalig lofug fig sa ne el amtakwalig nihe la nai la afa el amtakwalig onigig la nai lai enag olyi ne afohie. Afa nofkenagag mo sa ne kehlifu sa ne faigo asa ne ofenaiba bagnofut of la ombusug afohie. Afa ne enaig esigbi asa kana gafugag mas awaiye afa sa enag osuna Kraiss bloiba asa ka sifakale fe.

<sup>17</sup> Afa Ju elni pris sis tigi finim afa wain bug sugfufinim asa Godim tuhlu faiyifini. Enaba lasug mo ogfug nengelni olug onigigim. Afa sa el atiamba kam tigi fatigbi asa kana taf sugfufe ofenaiba wain bug ka Godim afai. Afa sa kam

enaig fenagba eba ka sifakale fe afa nengel kana sifakalim ne esinig.

<sup>18</sup> Afa gwenaig sa ne sifakali afa ka gafa nengelni sifakalim ka esenig.

*Pol Timoti mi Epafroditus mi ningitigina*

<sup>19</sup> Afa atiamba Ainiyag Sisasna sawieg fegba eba kog ka Timoti mi nengel nangum ningihia enag ati meyi ofe. Afa sama pese blo kam sihinai nengelni mom ka sa enam sifakale.

<sup>20</sup> Afa mas amban Timoti lofug feg mo ka mungu onigig ahfegim afa ehe nem fwina oniginig.

<sup>21</sup> Afa mingnag hefum mungu onigig afa mas Sisas Kraisna gafugagim onigig mo. Eba awai.

<sup>22</sup> Afa ati ne ehena suialag gafugagim anwenafig afa sa ehe ka i suialag mo ka gafugag ahfeg ofenaiba leg alag ahfeg.

<sup>23</sup> Afa enanam ka higife mangwal sa kam pugunafe eba kog kasa Timoti mi nengel nangum ningihia.

<sup>24</sup> Afa ka onigig eba Ainiyag kam kweagfuiba asa ka gafa managig fwainig nem nangwagigim blofe.

<sup>25</sup> Afa ne bimbeafna nilitem Epafroditusim ningihigbi asa blog kam kweafug asa ehe ka i mungu gafugag ahfeule feg afa ami lofug fag la wasneig gohule feg. Afa ka onigig koka sa ehem pese nengel nangum ningihian.

<sup>26</sup> Afa ehe fwina nem oniginigim asa ona blo afa ehena olug kinig asa ehe higig nengel ati ehena gihim anwenafig.

<sup>27</sup> Afa eba nufunam enag gih ehem ati lahagim muhla ofefena. Afa God ehem aflafenagim asa wangene fe fatig. Afa God gafa kam aflafenag asa mas ehem lahai. Masa mingnag kinig kam pugunagefe.

<sup>28</sup> Asa ka fwina membeg ehem pese nengel nangum ningihiaiba asa ne ehem nangunim afa ne sifakalini afa ka mas ehena kinigim onigi.

<sup>29</sup> Afa maia bloiba asa ne enaig onigigfi Ainiyagna el nengelni nilite ati pese blog asa ne ehem sifakaligna lala gam wanigafu. Afa sa ne mungwali enaig elim nungwe mo sihigon.

<sup>30</sup> Afa Epafroditus mas hefum onigi. Eba ne membi auguiaba afa ehe blog nengelni kugum flagim asa nengelni gafugagim hwanai yi fiahgeg. Afa enaba Kraiswa gafugagim onigigim kam kweafugum asa hefum lahagim meyi ofe.

### 3

*Ambangel sa Sisasim olug onigig enag mungu suialag elbi fig*

<sup>1</sup> Afa kana nilite ka hwa mo fwahagim ofeba ka nem weti mo osihin. Eba enaig eseg ne Ainiyagna el asa ne sifakali. Ilawana sa ka sonaigim ginofenaba enaba ka mas pese ginofegim ka yiskosei sa ma enag nem kokmo lambfegofi.

<sup>2</sup> Afa sa ne numwehifibi masa amtakwalig el nem ambe munia mo sihigofie og sa big Ju elni nihem patalgiafunam asa bimbeafna nihim kokhiagi.

<sup>3</sup> Afa enaig moba mas ihlafeg mo. Eba enaig eseg bigelbi eba enag nihem big nufunam patalfug asa Godna Sungwabug bigim kwaganigba asa big Godna unehlagim fingi fig. Afa big anwenafig bigelni suialag gafugag eba mas bigim kwagani afa Sisas Kraisa munguhe bigim lambig.

<sup>4</sup> Afa atiamba Ju elni nihe elim Godna nof la ihlafenigbi asa kana nihe ehengelni nihem gwesim hilifeg ikag.

<sup>5</sup> Afa ka Ju elni nihem mungwali patalkufena. Afa kikiafena afahumonig eba Ju el afa ehengelbi Benjaminna simbiangag fini. Afa maia elegeg la gohug osuna awaienaba asa kikeafena afag kam wanigenaba asa ehengel kana nihim kokohinagini. Afa kaba farisi el asa ka Mosesna nihe numweheg patalfefku.



<sup>6</sup> Afa kana olug fwina wagofenaba asa ka Ju elni nihem numwehe fukufenaba afa sa ka sios elim kinig faifini. Afa ka Mosesna nihe mo patalfefkufenaba asa mas amban kam haigim sehiana mo.

<sup>7</sup> Autunam ka onigina sonaig nihe eba kam Godna nof la ihlafenafe. Afa glauwaba ka Kraism olug oniginagim afa kog sonaig niheba eba esug feg.

<sup>8</sup> Afa ka onigig sonaig nihe i afa mungwali kana gafugag i eba esug feg. Afa kana Ainiyag Sisas Kraism ka ati anwenafeg eba enag goseg. Afa sonaig gawig eba ati ka esgum fungiske lofug klaitig afa koka sa Kraism numwehe anwenafenam asa ehena el nemug fenam

<sup>9</sup> asa ka ehe nai yi gofim. Afa autunam ka enaig onigig fena ka kike enaig esenaba asa ka Godna nof la ihlafena afa ka Mosesna nihe mo patalkuiafena. Afa glauwaba ka anwenafeg ka Kraism olug oniginagba asa ka Godna nof la ihlafeg. Afa God kana olug onigigim nangugim asa kam enaig esena.

<sup>10</sup> Afa koka numwehe Kraism anwenafenage. Afa Godna wasneig ehem biteg kifenai ihlafa fatig afa ka membeg enaig wasneig sama kam gohnai. Ka sa gwe-naig nihem patalkuiba sama kam kinig i lahad i gwe-naig pugufenai.

<sup>11</sup> Atiamba ka enaig esegba ka onigig ka gafa God sama kam biteg kife nai ihlafa fati.

### *Wasneinim mina suf afu*

<sup>12</sup> Afa ka mas enaig esoi kog kati Kraisma enaig nihem flag afa ka suialag el nemug feg. Afa Kraism gafuga fegim kam suliaflag asa ka fwina enaig gafuga feg ka ehena nihem kehla guhminefe.

<sup>13</sup> Kana nilite sa hig, ka mas enaig esoi eba ati ka enaig pugug, amo eba awai. Ka enaig onigig kehlag, masa ka

pese autunaim onigife afa sa ka wasneinam sufug mina ika.

<sup>14</sup> Afa ka ming onigi feg koka fwina wasneina ikan mangwal sa go enanai yi pugu. Afa enaigba eba ka Sisas Kraism olug oniginaiba asa ka God i wahkig nofkikena hawag fife.

<sup>15</sup> Afa bigelnai amban sa saglagna olug onigig lofug fegba enaig el sama kana onigig lofug gwenai esei. Afa ne haig onigig fegba eba God sama nem ogfunai.

<sup>16</sup> Afa atiamba enaig onigig gohugba eba sa mangofi. Afa enaig onigig sama gose ikafiba asa ati big anwenafig enaba nufunam feg sa big patalfu.

<sup>17</sup> O nilite afa kangel ati ka nem suialag nihe ogfugonig afa sa ne enam patalfu afa ambangel el sa gwenai esig afa sa ehengelim numwehe nangwagim sa ne anwenafi.

<sup>18</sup> Afa sa ne enaig esi afa kaksag el eba angoluweg el asa ehengel Kraisma li katigeg mom amtakwale skofig. Afa autunam ati ka enaig moba sihiagohug afa glauwaga ka pese wena mona sihig.

<sup>19</sup> Afa ehengel hiafgelni eligni sawiegim fingi fig. Afa hiafgelni amtakwalig nihem mas afwanefi eba og eba suialag. Afa ehengel eba bitenai gawigim mungu onigig. Afa nengel sabanig eba nem suwi lagig kembang gam God nem lambi klaitife.

<sup>20</sup> Afa bigelni nufunam kembang eba heven. Asa big nenge afofum bigelni kwefwag el Ainiyag Sisas Kraism hevenim fwahanam asa blofe. Asa big membis sama ehe ikagna bloi.

<sup>21</sup> Afa eba ehe heafna wasneigni blonam bigna auwiaug lahad lofugim waikafenam asa heafna wasneig elig suialagna big fifi. Afa enag wasneigni mungwali gawig esinibi asa apaiye ehena ahnai skaufifi afa bigna eligim waikafenife.

## 4

*Na sifakalinim mungu onigig fli*

<sup>1</sup> O nilite, ka nem fwina membenigim afa koka blo nem nangwagim. Ne kana suialag hihe fig afa ne kana li fug lofug fig. Afa sa ne wasnei afohiefiba asa ne Ainiyagim olug onigigim fwina kehli.

<sup>2</sup> Afa sambaganigi angwafig nengelnai enaig safeg hefum moanag ahfeg. Ka ehenigim esonig kog, “Yuodia i afa Sintike i nofeka nimbefum flafihiaig ahfe. Ati ne Ainiyagim olug honiginag asa ne eteg sumineg lofug mungu ahfe.”

<sup>3</sup> O kana suialag hihe, ka membeg sa ne sambaganigi angwafig kwaganiba asa ma suialag hawag ahfei. Ehenigi ahfeg afa Klemen feg afa mingnag apaiyeg enag kam kwefug suialag mo sihiafuiag. Asa God ehengelni unehlag nofkenagag buk la sko fwahanig. Afa amban el sa Godim olug oniginig enag elni unehlag eba ena buk la go.

<sup>4</sup> Afa sa ne sifakale eba ne Ainiyag i suialag hawag ahfefe. Afa ka pese nem osihini kog eba sa ne sifakale.

<sup>5</sup> Afa sa ne mungwali elim aflahlana fegon asa Ainiyag ati blogim meyi ofe.

<sup>6</sup> Afa nofeka mangwalim fwina onigwageakafim nofeka enaig ese sa ne Godim mangwalim sahnam afa ne nimbeafna onigi la Godim suialag ona.

<sup>7</sup> Afa God olug enesieg fatigba eba kwaniafiageg afa enag elni anwenagim gosenig. Afa ne Sisas Krai i ati ahgo afa enag olug enesieg ehe fatigba neana onigigim ninimwehefug asa mas neana olugim tigeфуpei.

<sup>8</sup> Kana nilite sumiamo ka nem ginof ofen. Afa sa ne mungwali hihe suialag nimbeafgelni onigig la lambi laitiagi eba enaig eseg mangwal sa suialafeg afa mangwal sa nufunam feg afa mangwal sa afsug feg afa mangwal sa

Godna nof la ihlafeg afa sama el enam fingi fi afa mangwal mas haig esei afa mas mwakwale asa enaigim ne onigim.

<sup>9</sup> Afa ka nem ogfugnugegba afa ne kana mo higig afa ne nangug mangwal sa ka eseageg sa ne enam patalfu. Ne enaig esibi afa God bigim olug enesieg fatinibi sa nem gohunfufe.

*Pol Filipai sios elim suialag oni*

<sup>10</sup> Afa ne kam pese oniginigim afa glau ne kam kwefug asa ka Ainiyagim fwina sifakalenag. Afa ilawana ka nenge gohug afa ka anwenafeg ne mas kam etetinig mo afa nem mina awaienigbi asa ne mas kam kwefug mo.

<sup>11</sup> Ka mas enaigba esoi afa ka onigig el mas kam membinim afa kwefui, eba awai. Afa ka enaig anwenafeg afa haig haigba kam pugunagba eba ka aflahlana gofufe.

<sup>12</sup> Ati ka anwenafeg enaignam kam tumenag afa ati ka anwenafeg afa ahnanam mo mas kam tumenai. Afa ati ka enaig anwenagba lambig haisegba eba ka suialag gafefe. Afa atiamba kana fane i gawig i fegba awai awai me afa ka mas onigi afa eba ka suialag gafefe.

<sup>13</sup> Afa Kraiss kam wasneig faigba enag maia haig haig kam pugunagba asa ka ehena wasneig i go.

<sup>14</sup> Afa maia ka kinig yi gohba ne kam kwefug afa enaba suialag nihe ne fig.

<sup>15</sup> Afa nengel Filipai la nai el ati anwenafig enag eba nufunam. Ilawanam ka nem Godna suialag mo sihi fwahanim afa ka Masedonia provinsim fwaha akofenaba afa mas ambangel sios kam kwefuni mo eba awai nengel mungu ne kam kwefuni afa sa big bimbefum mimange awagig nihe bifini.

<sup>16</sup> Afa maia ka Tesalonaika kembang la gawig tumeage gafenaba afa ne kam kwefufini.

<sup>17</sup> Afa nofena enaig onigig kam fenagi ka nengelni enaig lamblu feniguo amo ka sifakaleg God sama neana suialag nihem mungwa fai.

<sup>18</sup> Afa ka nem osihin, afa mangwal sa ne ningihigbi Epafroditus flagim ublug kam faig afa ka glauwaba kam ihlafenagba asa ka kaksag feg. Afa enaig gawig sa ne kam faigbi ofenaiba pris sanda Godim tuhlunigbi asa suialag emblegusug pugugba asa God enam sifakalenag.

<sup>19</sup> Afa Godim sa ka lotufenag enag ehe mungwali gawigba ihlafeageg. Afa ka anwenafeg mangwal sa nem awainig eba God nengelim Sisas Kraisna elim ihlafenugefe.

<sup>20</sup> Afa ehe bigelni God Alag feg asa big ehena unehlagim wahkig fingi finifum. Eba nufunam ehe feg.

*Mo fwahag mo*

<sup>21</sup> Afa ka Godna elim sa Sisas Kraisim olug oniginig enam ka nem enaig sihi ofen ka mas nem etetinig mo. Afa nilite sa ka auguia enag gafa nem gwenaig esegonig.

<sup>22</sup> Afa mungwali Godna el hwanai yi goka gwenaig mo nem faigog. Afa Romna misog elni lala nai gafugag kristen el gafa nem fwinam onigigonigim asa mungwalofug mo nem faigog.

<sup>23</sup> Afa ka sawi feg sama Sisas Kraisna esmunagim kwe-fwag sama nengelim gohunfi. Enag ginofba gwenaho.

## Godna mo Awai mona go

The New Testament in the Amanab language of Papua New Guinea  
Nupela Testamen long tokples Amanab long Niugini

Copyright © 2001 The Bible Society of Papua New Guinea

Language: Amanab

Dialect: Amanab

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-07

---

PDF generated using Haiola and XeLaTeX on 27 Sep 2019 from source files dated 5 Mar 2019

c3aa68d3-f454-5eb2-b8b2-3405de6bf338